

**Preek geskik vir Drie-Eenheidsondag - of enige ander geleentheid**  
**Skriflesing: Filippense 1: 27 - 30**

*Filip 1: 27. Hoofsaak is dat julle lewenswandel in ooreenstemming met die evangelie van Christus moet wees. As ek dan kom, sal ek self sien, of as ek nie kan kom nie, sal ek deur berigte hoor dat julle in volkome eensgesindheid standvastig saamstry vir die geloof in die evangelie*

*28. en julle in geen opsig deur die teenstanders laat afskrik nie. Dit is vir hulle 'n teken van hulle ondergang en van julle redding, en dit kom van God.*

*29. God het julle die voorreg gegee om Christus te dien, nie alleen deur in Hom te glo nie, maar ook deur vir Hom te ly.*

*30. Julle en ek het dieselfde stryd wat julle my vroeër al sien stry het en waarvan julle hoor dat ek nou nog stry.*

**Inleiding:**

As 'n gemeenskap plaas ons 'n hoë premie daarop om die waarheid te praat. Ons leer ons kinders om nie leuens te vertel nie. Soms, veral as ons in die moeilikheid beland, is die versoeking daar om ook 'n leuen te vertel, wat ons meestal nog meer probleme sal besorg. Al gaan die leuen ook hoe snel, die waarheid agterhaal hom wel!

Eerlikheid is een vorm van die waarheid. Daar bestaan 'n "absolute waarheid". Dis waarna Pilatus vra as hy vir Jesus sê: Wat is waarheid? Die tyd waarin ons leef, wat alles relatief wil maak, voel al hoe meer dat die waarheid deur die situasie bepaal word en "**dat daar geen absolute waarheid is nie, maar slegs persepsies**". So 'n siening lei ook tot situasie etiek, waar reg of verkeerd deur die konteks van omstandighede bepaal word.

Enkele redes waarom mense in verset is teen die gedagtes van absolute waarheid, is omdat hulle die Bron van die Waarheid, die Vader van ons Here Jesus Christus nie deur die werk van die Heilige Gees aanvaar nie en ander vorme en idees as wat die Bybel leer oor wie God werklik is aangehang word. Dié mensgemaakte idees word dan bo God se openbaring van Homself verkies.

**Die waarheid waaroor daar by ons geen twyfel mag bestaan nie, is:**

Ons glo die Here ons God, is die enigste Here,  
Skepper en Onderhouer van alles wat bestaan,  
en Jesus Christus is alleen Redder en Verlosser uit sonde en dood  
en dit is net die Heilige Gees wat ons roep om God se kinders te wees,  
wat die Kerk versamel, lei en inspireer.

Ons glo in die Heilige Drie-enige, Vader, Seun en Heilige Gees.

Die absolute waarheid in die Skrif, en alle ander waarhede oor God en oor ons dissipelskap is onder verdenking, gewoon omdat Christene, hoewel hulle hierdie waarhede verkondig en leer, self dikwels nie daarvolgens leef, praat en bid nie. So bring ons die waarheid oor die Drie-enige God, soos in die Skrif geopenbaar, onder verdenking en skep die persepsie dat dit nie waar of betekenisvol is nie. Dit as mense sê dat wat ons sê mooi klink, maar wat ons doen is aaklig en onaanvaarbaar.

In ons teks praat Paulus daaroor hoedat Christene God se waarheid moet leef - selfs in die aangesig van die teenstand van die kultuur waarin ons leef. Ons moet Jesus se opdrag om “sout” en “lig” te wees, baie ernstig neem.

**Rig jou lewe in volgens wie jy is: ‘n Christen.**

Ons moet goed begryp wie ons is, en daarvolgens lewe.

Ons moet verstaan dat ons burgers van die hemel is. Die uitspraak in vers 17 oor ons “lewenswandel” beteken letterlik dat ons as burgers van die hemel moet leef. (dieselfde woord in hfst 3:20 vertaal as “burgers van die heme”; (sien ook 1933/53 Afrikaanse vertaling) Terwyl ons op aarde is, moet ons nie vergeet waar ons werklik tuishoort nie. Ons burgerskap is in die hemel en ons moet daarvolgens lewe. Ons moet as ambassadeurs van die heilige Drie-Enige God lewe.

Ons probleem is dikwels dat ons nie goed genoeg begryp hoe radikaal die wedergeboorte ons lewens raak nie. Dat ‘n nuwe mens tot stand kom wat wel in die wêreld is, en tog nie meer van die wêreld mag wees nie. Ons uitdaging is om onself in dié lig te sien. Dit sal net gebeur as ons lewe op aarde, saam met God in Christus, onder leiding van die Heilige Gees weerspieël. Studie en verstaan van God se Woord en genoeg tyd in gebed sal ons help om dit te verstaan. Om elke dag die Gees te vra en toe te laat om ons nader aan Christus te bring, om die Vader te kan dien, sal ons help om dit te verstaan.

**Ons moet vas staan by die Waarheid..**

Die tweede ding wat ons moet doen is (vers 27) om op te staan vir en vas te staan by die absolute waarhede wat God openbaar het.

*27: ... dat julle in volkome eensgesindheid standvastig saamstry vir die geloof in die evangelie.*

As Christene ken ons die waarheid van die Evangelie. Dis nie ‘n arrogante uitspraak nie, hoewel sommige ons daarvan beskuldig. Dis eenvoudig iets wat ons wat verlossing ken, self ervaar het en dus kan ons daarvan getuig. Dit is die geloof waarvan Paulus praat. Die goeie nuus wat ons beleef het, moet ons ook met ander deel. Maar hoe doen ons dit?

Eerstens met eensgesindheid. Daar staan letterlik in die oorspronklike ons moet een wees van gees; of is dit in die Gees? Ons krag lê daarin dat ons een van hart is, omdat een Gees ons daartoe in staat stel. Sedert die Pinksterervaring van die Kerk soos beskryf in Handeling, het ons die krag om vir die waarheid vas te staan. Hierdie krag kan net in eensgesindheid / een van gees wees en deur van die Gees te wees, bekend word in die wêreld. Die verdeeldheid tussen gelowiges lê struikelblokke op die pad van ongelowiges om die waarheid te kan aanvaar.

Soos ons God ‘n God in verhouding is - van ewigheid af Vader, Seun en Heilige Gees, so leef ons nie net in verhouding met mekaar nie, maar volg die groot vrede tussen die Persone van die Drie-enigheid in alles wat ons doen.

Tweedens moet ons vas staan vir die waarheid ter wille van die Evangelie. Dit is die waarheid wat mense vry maak en ons mag nie toelaat dat dié waarheid korrup gemaak word deur menslike interpretasies en filosofiese bevraagtekening nie.

Jesus het aan ons goeie nuus gebring wat ons met die wêreld moet deel soos Jesus die Vader en die Gees aan ons kom openbaar het. Daarin is redding, verlossing en vryheid te vind. Dit is kosbaar en moet bewaar word. Ons moet ons vir die bewaring daarvan inspan.

**Moet jou nie deur teenstanders laat afskrik nie.**

Ons moet laastens gewillig wees om teenstand te verwag en ten spyte daarvan, vas te staan by die waarheid van die Evangelie.

Dieselfde mense wat verdraagsaamheid van ons eis as ons Jesus as die enigste Weg, Waarheid en Lewe verkondig, is dikwels die mees onverdraagsame van almal teenoor Christene, wanneer ons Jesus wil eer as ons enigste Saligmaker en as God se plan om ons te red deur die werk van die Heilige Gees.

Hulle relatiewe waarhede moet ons verdra en daarvoor plek maak in die wêreld. Wel, Christene behoort sekerlik vryheid van geloofskeuse te bevorder en vervolging van enige persoon vanweë geloofsoortuigings teen te staan en vir reg tot selfstandige geloofskeuses te stry.

**Maar ons vra ook dieselfde reg en voorreg vir onself.** Ons wil en moet staan vir die waarheid van die Evangelie as openbaring van die redding deur die Drie-Enige - en dit sonder om bang te wees.

***Martin Luther skryf in die kragtige gesang waarvoor hy so bekend is:***

***Al storm hul ook van elke kant, die hel se leërmagte, die Een wat sterker is, hou stand, Hy sterk ons swakke kragte.***

Ons moet die woord van die Here aan Josua in Jos 1:19 onthou, dat ons sterk en volmoed moet wees en ook dapper in die geloof in die een, enigste God. Ons moenie bang wees nie. God is altyd by ons, Hy het ons die opdrag gegee om sy karakter, bestaan en koninkryk te verkondig en sy wil te soek. Dit is sy waarheid waarvoor ons stry. Hy is met ons, altyd!

**Appél:**

Wanneer mense sien dat ons met moed en oortuiging staan by die waarheid van die Evangelie, selfs te midde van teenstand, sal hulle besef dat die krag van God ons staande hou. *Dit is vir hulle 'n teken van hulle ondergang en van julle redding, en dit kom van God. (vers 28)*

En dit sal opoffering vra. As jy op soek is na 'n manier om God en sy waarheid te dien, sonder om opofferinge te maak, vergeet dan maar van die Christendom!

Kyk weer na vers 29: . *God het julle die voorreg gegee om Christus te dien, nie alleen deur in Hom te glo nie, maar ook deur vir Hom te ly.*

Ons moet leef soos burgers van die hemelse ryk. Ambassadeurs van die lewende, enigste God - Vader, Seun en Heilige Gees. Selfs te midde van teenstand en selfs vervolging. Te midde van 'n wêreldkultuur wat aanstoot neem aan die absolute waarheid dat God die Vader in Christus alleen en deur die werk van die Gees alleen, verlossing bied.

Dit is die woord van God, in die Naam van die Vader, Seun en Heilige Gees, Amen.